

# RTR – dapli che mo ina chasa da medias

Radiotelevisiun Svizra Rumantscha: 70 onns radio – 50 onns televisiun

DA MARIANO TSCHUOR, DIRECTUR RTR

**L'outer onn, 2013, pudain nus ans reguardar da dus eveniments d'impurtenza per la Svizra rumantscha: 70 onns Radio Rumantsch e 50 onns Televisiun Rumantscha.** 1943 ha Adolf Ribi, redactur dal radio da Turitg, introduci emissiuns da radio rumantschas regularas. Quellas vegnivan emessas l'emprim venderdi dal mais. Ils 17 da favrer 1963 è l'emprima emissiun en linguatg rumantsch vegnida emessa a las 16.15 sin il chanal da la televisiun da la Svizra tudestga. Il num da l'emissiun «Balcun tort», cumpilada da Tista Murk. Luisa Famos ha fatg l'annunziadra, Duri Capaul e Clà Biert han legì ils texts. Las emissiuns vegnivan realisadas en la redacziun «Heimat», manada da Wysel Gyr.

## Pledadra u plidadra?

Gia tar quell'emprima emissiun vev'i dà differenzas linguisticas. Citat or da la brev dals 13 da favrer 1963 da Wysel Gyr a Tista Murk: «Ich möchte Sie höflich bitten, den Text genau durchzulesen und allfällige Fehler rasch möglichst direkt unserer Abteilung Graphik zu melden. Fräulein Famos ist der Meinung, dass man Pledadra schreibe und nicht, wie Sie es uns angegeben haben und wie wir es im Programmheft publizierten Plidadra.»

## Resun negativ en la pressa

Strusch stada emessa quella emissiun ils 17 da favrer scriva ina persuna che si-gnescha cun M.R.-S. en il «Fögl Ladin» dals 22 da favrer 1963: «Il titel da l'emischiu tunava: '25 Jahre Rätoromanisch als 4. Landessprache'. Nu s'avess que stuvieu er cul microfon e la camera in tuot nossas vals e piglier our il tipic, gieud, chesas, usanzas e provas da tuot ils idioms rumauntschs? Scha mussu üna baselgia catolica, ün pader e cruschs vi da las vias, nu vessas eir chatto üna bella baselgia refurmada? Ils Rumauntschs nu sun nempe be catolics. 25 ans quarta lingua ais passo, e la televisiun ho manchanto l'occasiun da fer ün'emischiu adequata, que am dis-plescha zuond.»

## Tge dat en egl guardond enavos?

Las dumondas, las preoccupaziuns e las occupaziuns èn restadas davent da l'entschatta fin al di dad oz pli u main las medemas: temp d'emissiun e meds finanzials, recrutar e scolar personal, qualitat e cumpetenza linguistica, represchentanza commensurada dals divers idioms, schelta dals temas per las emissiuns, diversitat da las opiniuns.



1980: L'equipa da la Televisiun Rumantscha. Da dretg a sanester: Gion Pol Simoneon, Edith Hossle, Elmar Deflorin, Giuseppe Decurtins, Ernst Denoth, Mic Feuerstein.

FOTOS MAD

Dumondas che han fatschentà tant ils responsabels per ils programs en il Griechun, mo er a Turitg ed a Berna, sco er il public da las emissiuns.

## En servetsch da lingua e cultura

Gnanc dubi: Emissiuns rumantschas da radio e televisiun èn vegnidias realisadas a sias uras fermamain sut il pretext linguistic. Promover il rumantsch, dersar quel, dar vusch e fatscha a quel, «visibilisar» el: quai era la legitimaziun primaria. Gea, i deva schizunt in temp nua ch'il Radio Rumantsch aveva da dersar «neologismes» e regiuvinar uschia il rumantsch. Perquai n'èsi betg da surstar/far curvien sch'exponents dal moviment rumantsch stevan a l'entschatta a la testa per diriger las emissiuns rumantschas. E tant sco tut las persunas da la «nomenclatura rumantscha» sa participavan er activamain sco auturs, commentatur e pledaders vi da las emissiuns.

## La midada tar il schurnalismem per rumantsch

A partir da 1984, cun introducir l'emissiun d'accopagnament «Allegra», pon ins constatar ina tscherta midada: Il lin-

guatg è il vehichel per in cuntegn schurnalistic, na il cuntegn sez. Era tar la televisiun datti ina metamorfosa: las emissiuns «Direct da...», ils divers gieus, lura sa chapescha l'emissiun «Muschkito», pli tard ils divers films documentars, han avert portas a novs formats ed ad ina avischinaziun schurnalistica a temas e cuntegns. Oz sa definescha RTR sco la chasa da medias per la Svizra rumantscha e porta perquai era dapi 2010 il num: Radiotelevisiun Svizra Rumantscha (e na Radio e Televisiun Rumantscha). Criteris schurnalisticèn il parameter per decider davart la schelta da temas, cuntegns e furmas.

## Resuns dal public

Dal temp dal «Fögl Ladin», da la «Casa Paterna/La Punt», da la «Gasetta Rumantscha» ed era da la «Pagina da Surmeir» (ch'exista anc adina) scrivevan aspectaturas ed aspectaturas regularmain faschond da savair lur parairi. Qua devi resuns magari critics, gea salads. Reclama vegnivan ils temas, las scheltas dals partenaris d'intervista, la dominanza regionala ed idiomatica (tut tenor vista: ina giada Engiadina, l'autra la Surselva, main il Grischun central), il manco d'o-

bjectivitat schurnalistica. Insumma: il Radio Rumantsch e la Televisiun Rumantscha stevan, sco ins di oz, en il focus da la publicidad. Quai gieva fin tar las plazzas. Pladiva il radio ina persuna sco redactura u redactur or da la «fallada» regiun u confessiun, pudeva quai dar reprimandas. Na adina publicas, dentant via correspundenza.

Ils onns 80 e 90 èn spezialmain duas emissiuns stadas sur la marella publica: l'emissiun da televisiun Muschkito ed era tschertas emissiuns da la Scuntrada, in' emissiun da radio. Suenter l'onn 2000 èn ils resuns publics sa reducids marcantamain. En La Quotidiana ha il «Murgnac» da pia memoria furà sut il pretext da l'ironia da temp en temp, senza dentant entrar substancialmain en materia.

## RTR – da Mustér a Müstair

Ins po pia constatar: La populaziun rumantscha ha adina prendi art e part dals svilups da RTR, ha – e quai è l'essenzial – tadlè e guardà stediamain e cun viv interess il programs rumantschs ed ha renconuschì la prestaziun dad RTR, tant sin il palançà linguistic sco era schurnalistic. Specialmain la rolla che

RTR ha già – ed ha anc adina – per avschinar ils idioms e per promover la chapschita da quels ed uss era quella dal rumantsch grischun, survegn notas excellentas. Da vart schurnalistica vegn primarmain l'infurmazion locala e regionala apprezzada grondamain. E na d'emblidar: La rolla da RTR sco promota da la cultura rumantscha. Ins patracta be als engaschis per il chant rumantsch. Ins pudess pia bunamain pretendere che RTR ha – ensemens cun autres organisaziuns ed interresa – creà ina schientscha per la Svizra rumantscha.

## Dus giubileums

70 onns emissiuns regularas da radio, 50 onns emissiuns da televisiun: questi dus giubileums commemoresha RTR 2013. Quai vegn fatg primarmain en ils programs da radio e televisiun e sin la pagina d'internet. Dentant era cun occurrentas spezialas. Per metter en evidenza l'importanza da RTR per nossa societat sco in'interpresa dal servetsch public, in'interpresa autonoma che stat cumplianamain en servetsch da ses public, da la populaziun rumantscha en ed ordaifer la Svizra.



1963: Toni Halter sa participescha en l'emprima ediziun dal Balcun tort e vegn filmà en sia stiva a Vella.

1993: Péz a cup tranter las moderaturas da l'Istorgia da buna notg e politichers. Da dretg a sanester: Vincent Augustin, Ida Columberg-Nay, Mariano Tschuor, Lucia Netzer-Peduzzi, Duri Bezzola.